

Sense di Nestri Signôr Gjesù Crist

Jutoris pe Liturgjie

Domenie, ai 2 di Jugn dal 2019

La gnove che si lei sui gjornâi e je clare: sul lâ a mont dal Istât i pelegriins a cjataran inclostrade la puarte de Madone di Barbane. Il santuari, par mancjance di fraris, al vignarà sierât. L'imagjine di chê isule deserte, il savê che altris santuaris dal Friûl a son a riscjo, il constatâ che la istituzion de glesie si slontane de int e la int simpri plui de glesie no rint plui bieles la solenitât de Sense che vuê o celebrin.

Une domande di fâsi e je cheste: se la Sense e je la elevazion - glorificazion - dal nestri Mestri e Pastôr, ce glorie par lui tal nestri popul e in cheste societât? O vin di ponisi cheste riflession, cirint une rispueste concrete in ce che o vin sbaliât e o stin sbaliant, par podê rivâ al cambiament, a la conversion e al perdon dai pecjâts.

. Dome cussì Crist al podarà tornânus a dî ancje vuê: ve che jo o mandarai sore di vualtris il Spirtu Sant, il Confuartadôr; lui us menarà a la veretât dute interie (Zn 16, 13).

Celebrin duncje la solenitât de Sense in umiltât, fiducie e fede, cence grandis ilusions ma ancje cence inutii laments che no servissin a nuie.

Antifone di jentrade

At 1,11

Umign di Galilee, parcè po staiso li a cjâlâ il cîl?

Come che lu vês viodût a lâ sù viers il cîl,
cussì al tornarà, aleluia.

Si dîs Glorie a Diu.

Colete

Diu onipotent, fasinus gjoldi di sante contentece
e cuntun agrât plen di religjon,
parcè che la sense di Crist to Fi e je ancje la nestre
e là ch'e je rivade la glorie dal cjâf,
li al è clamât a sperâ ancje il cuarp.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

O ben:

Diu onipotent, a nô ch'o crodin
che come vuê il to Unigjenit e nestri Redentôr
al è lâs sù intai cîi;
danus, par plasê, di vivi ancje nô lassù cul nestri cûr.
Lui ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

At 1,1-11

Si è alçât par aiar sot i lôr vôi.

Ancje in zornade di vuê tune societât e sisteme glesiastic che a van a slas, int e cristians si domandin su par jù: Signôr, esal chest il timp che tu tornarâs a meti in pîts il ream di Israel?

Moviments catolics, fra visions e rivelazions di segrets a previodin cjastics trements di Diu o subit o in curt. Acetèn la rispueste di Gjesù: No us sta a vualtris di savê i timps e i moments...

In cheste solenitât de Sense la leture nus domande ancje: parcè po staiso li a cjalâ il cîl? e nus invade a sbassâ i vôi te realtât che o stin vivint, li che la prime regule dal Signôr e je: mi sarês testimonis. E cemût vivi vuê, di testimonis de vite di Gjesù? La rispueste no pò rivâ dai nestrîs resonaments umans, ma dome de invocazion de fuarce dal Spirtu Sant ch'al vignarà parsore di vualtris.

Dai Ats dai Apuestui

Tal gno prin libri, Teofil, o ai tratât di dut ce che Gjesù al à fat e insegnât, di cuant ch'al à scomençât fint in chê di ch'al è stât puartât sù in cîl, dopo di vêur dât lis sôs istruzions ai apuestui che ju veve siezûts midiant dal Spirtu Sant.

Dopo de sô passion, lui si è pandût a lôr vîf, cun cetantis provis, comparintjur par corante dîs e fevelantjur dal ream di Diu. E biel ch'al mangjave cun lôr, ur à comandât di no slontanâsi di Gjerusalem ma di spietâ li ce che il Pari ur veve imprometût, «ce ch'ò vês sintût, dissal, de mê bocje: Zuan al à batiât cu l'aghe, vualtris invezit o sarês batiâts cul Spirtu Sant di chi a pôcs dîs».

Cjantansi duncje insieme, i an domandât: «Signôr, esal chest il timp che tu tornarâs a meti in pîts il ream di Israel?». Ur à rispuindût: «No us sta a vualtris di savê i timps e i moments che il Pari si à riservât par sè. Ma o cjaparês la fuarce dal Spirtu Sant ch'al vignarà parsore di vualtris e mi sarês testimonis a Gjerusalem, par dute la Gjudee e la Samarie e fint ai ultins confins dal mont».

Disint cussì, si alçà par aiar sot i lôr vôi e un nûl ur al strafuî dai lôr vôi. Intant che lui al leve sù, lôr a cjalavin fis il cîl: e ve che si ur presentin dôs personis a blanc che ur disin: «Umign di Galilee, parcè po staiso li a cjalâ il cîl? Chel Gjesù che us è stât strafuît viers il cîl, al tornarà come che lu vês viodût a lâ sù in cîl».

Peraule di Diu.

SALM RESPONSORIÂL

dal Salm 46

Chest salm nus presente la Sense tune vision grandiôse li che dute la tiere e partecipe dal ingrès di Crist in cîl. Tune tâl fieste li che al va sù il Signôr fra cjantis di gjonde, al ven fat un invît ancje a noaltris: Dait sù cjantis a Diu, dait sù cjantis.

R. Al va sù il Signôr fra cjantis di gjonde.

Se cjantât: Il cjant dai salms responsoriâi, p. 221.

O ben:

R. Aleluia, aleluia, aleluia.

Batêt lis mans, popui de tiere,
scriulant al Signôr in ligrie.

Parcè che trement al è il Signôr des schiriis, l'Altissim,
lui al è il grant re sun dute la tiere. **R.**

Al è lâs sù Diu framieç dai berlis,
il Signôr compagnât dal sunôr de trombe.
Dait sù cjantis a Diu, dait sù cjantis;
dait sù cjantis al Signôr, dait sù cjantis. **R.**

Lui al è il re di dute la tiere:
une biele cjante dait sù a Diu.
Diu al à tacât a regnâ sui popui,
Diu si è plaçât su la sô sante sente. **R.**

SECONDE LETURE

Crist al è jentrât tal cîl.

Cumò nus ven presentade la Sense di Gjesù no plui tes imagjinis di Luche, ma tal significât profund che la Sense e à in sé pe salvece di ducj nô.

L'autôr de letare al pon spes un confront fra il Vieri e il Gnûf Testament, fra la liturgjie dal templi e chê cristiane. Chest confront, nus fâs comprendi miôr l'azion di Crist che al è jentrât adiriture tal cîl, par presentâsi denant di Diu pal nestri ben.

L'autôr al tire ancje lis consequencis di dut chest: Vint duncje, fradis, plene libertât di jentrâ tal santuari midiant dal sanc di Gjesù... svicinînsi cuntun cûr sclet...

De letare ai Ebreos

9,24-28;10,19-23

Crist nol è jentrât tun santuari fat de man dal om, spieli di chel vêr, ma adiriture tal cîl, par presentâsi denant di Diu pal nestri ben, e no par ufrîsi sè plui voltis, usance il prin predi ch'al jentre tal santuari ogni an cul sanc di chei altris. In chest câs, di fat, al varès scugnût patî plui voltis de creazion dal mont in ca. Cumò invezit al è comparît une volte sole, cuant che i tîmps a jerin al colm, par parâ jù il pecjât midiant dal so sacrifici. E come ch'al è distinât pai oms ch'a muerin une volte sole, e dopo al ven il judizi, cussì Crist, dopo di jessisi ufiert une volte par dutis cul fin di parâ jù il pecjât di cetancj di lôr, al tornarà a pandisi une seconde volte, cence nissun rimpin cul pecjât, a di chei che lu spietin, par salvâju.

Vint duncje, fradis, plene libertât di jentrâ tal santuari midiant dal sanc di Gjesù, par cheste strade gnove e vive che le à screade par nô a traviers dal vêl, vadî de sô cjar, vint un grant predi sore de cjase di Diu, svicinînsi cuntun cûr sclet e plens di fede, cui cûrs smondeâts di une cussience triste e cul cuarp lavât cun aghe monde. Mantignînsi cence clopâ la profession de nestre sperance, parcè che chel ch'al à imprometût al è di peraule.

Peraule di Diu.

SECUENCE

SUMMI TRIUMPHUM REGIS

Cheste secuencia nus fâs pensâ a S. Pauli cuant che cjacarant di Crist al scrîf: Lant sù in alt al à menât daûrsi sdrumis di presonîrs, / al à dât fûr regâi ai oms... Al è lui che al à destinât un pôcs come apuestui, altris come profetis... par preparâ i sants al ministeri, par fâ sù il cuarp di Crist... (cf. Ef. 4, 8-12).

Intant che o lein cheste antighissime secuencia aquileiese, cemût no pensâ a lis nestris comunitâts cence predi? Vuê al è di invocâ Crist che nus dedi il regâl di personis - i sants - che a cjalin al ministeri, par che a restin viertis lis glesiis dai nestris paîs.

Lui nus mandi il Spirtu Sant, che al sedi simpri cun nô, fint a la fin dal mont.

Compagnîns la vitorie dal re cu la nestre laude;
lui che, cu la vitorie de justizie, al à tes sôs mans i bastons
dal comant dal cîl e de tiere,
lui che si è dât vie a un presit une vore grant
par riscatâns nô.
A lui i spiete un non convenient e gloriôs.
Di fat al à scjavaçât cence soste dutis lis monts
e dutis lis culinis di Betel.
Dal cîl al è dismantât jù intun grim virgjinâl
e di li tal grant mâr dal mont.
Dopo di vêlu navigât dut cu la sô potence,
al à dât l'assalt al scûr trement dal flum dal infiêr.
Al à savoltade la paronance di chel potent;
al à gjavât fûr di li une grande schirie di int
e cul so sflandôr al inlumine il mont.

Il vincidôr al à menade daûrsi la sdrume
di chei ch'a jerin tignûts presonîrs li dentri,
e cussi, tornât in vite, al pues aromai palesâsi
ai siei servidôrs e amîs.
Vuê infin al à fat il salt plui grant,
svolant par simpri sore dai nûi e dai cîi.
Il popul fedêl ch'al celebri duncje cheste grande zornade
là che il Fi di Diu al à fat jentrâ cun lui,
tes altis sentis dal cîl, i cuarps dai mortâi.
La int e spiete trimant il judiç ch'al vignarà,
come che i doi agnui ur an spiegât ai fradis.
Chest Gjesù che us è stât puartât sù in cîl,
al tornarà a vignî, come che lu vês viodût a lâ.
Suplichin alore ducj insieme cence mai fermâsi
il Signôr nestri gloriôs;
par che de gjestre dal Pari, là ch'al è sentât,
nus mandî il Spirtu Sant.
Ch'al sedi simpri cun nô, fint a la fin dal mont.

CJANT AL VANZELI

Mt 28,19.20

R. Aleluia. Aleluia.

Lait e inscuelait dutis lis nazions, al dîs il Signôr.
Ve che jo o soi cun vualtris ducj i dîs,
fint a la fin dal mont.

R. Aleluia.

VANZELI

Intant che ju benedive, al vignive puartât su in cîl.

Lc 24,46-53

Tignî presinte pe nestre vite personâl la peraule che Gjesù al à dite prime di lassâ chest mont: Crist al scugnive patî e la tierce di resussità. Cussi ancje nô, come dissepui dal Signôr, o sin clamâts a jentrâ tal sacri Tridui di Pasche insiemi cun lui, come che ancje S. Pauli nus vise: O no savêso che ducj nô, che o sin stâts batiâts in Crist Gjesù, o sin stâts batiâts par unîsi a la sô muart? O sin duncje stâts sepulîts cun lui in fuarce dal batisim par unîsi a la sô muart, cul fin che, come che Crist al è resurît dai muarts midiant de glorie dal Pari, cussi ancje nô o vin un mût di vivi gnûf crei (Rm 6, 3-4).

Crist, alçant lis mans, ju benedì. Intant che ju benedive, si distacà di lôr. Signôr, ricuarditi di nô, danus la tô benedizion ancje a nô, intant che o fasìn fieste pe tô sense tes altis sentis dal cîl (secuence). Amen.

Dal vanzeli seont Luche

In chê volte, Gjesù al disè ai siei dissepui: «Cussi al è scrit: Il Crist al scugnive patî e la tierce di resussità dai muarts; tal so non si predicjarà a ducj i popui la conversion e il perdon dai pecjâts. Vualtris o sarês testimonis di dut chest, scomençant di Gjerusalem. E ve che jo o mandarai sore di vualtris chel che il Pari gno al à imprometût. Vualtris però restait in citât fintremai che no sarês riviestûts di une fuarce ch'e ven di adalt». Po ju menà fûr des bandis di Betanie e, alçant lis mans, ju benedì. Intant che ju benedive, si distacà di lôr e al vignive puartât sù in cîl. E lôr, dopo di vèlu adorât, a tornarin a Gjerusalem cun grande contentece. E a jerin simpri tal templi a laudâ e a ringraziâ Diu. Peraule dal Signôr.

Si dîs O crôt.

Su lis ufiertis

Signôr, ti presentin cun umiltât chest sacrifici
in memorie de sense venerabil di to Fi;
danus la gracie che, cun chest incuintri di robis santis,
o podin jessi alçâts a lis Realtâts dal cîl.
Par Crist nestri Signôr.

Antifone a la comunion

Mt 28,20

Ve che jo o soi cun vualtris ducj i dîs,
fint a la fin dal mont, aleluia.

Daspò de comunion

Diu onipotent e eterni,
che tu nus lassis celebrâ i misteris dal cîl
biel ch'ò sin ancjemò su la tiere, fâs, par plasê,
che la devozion e l'afiet dal popul cristian a tindin
là che dutune cun te e je ancje la nestre umanitât.
Par Crist nestri Signôr.

* * *

Riflession di pre Antoni Beline: **Une fuarce che e ven dal alt**

Cun vuê a scjadin i corante dîs di cuant che la glesie, imbombade de gjonde di Pasche, e à berlade la gnove, e à impiât il fûc e il ceri, e à benedide l'aghe. Ducj segnâi di chê grande rivoluzion che Crist al à fat cul vinci la muart e il pecjât e cul vierzinus lis puartis par une gnove vite...

Vanseli par un popul, an C, p. 91.

* * *

Cjants pal timp di Pasche

- Contait la buine gnove, *n. 66;*
- Crist nus da la sô lûs, *n. 158;*
- Victimae paschali laudes, *n. 159;*
- I cristians a cjantin laude, *n. 160;*
- Aleluia... O filii et filiae, *n. 161;*
- Sta legre, sante Glesie, *n. 162;*
- Christ ist erstanden, *n. 163;*
- Crist al è in vite, *n. 164;*
- Cristo risusciti, *n. 165;*
- Grosser Gott, *n. 166;*
- Al Agnel sacrificât, *n. 167;*
- Hvala veçnemu Bogu, *n. 168;*
- Te lodiamo Trinità, *n. 169;*
- Laudate Dominum, *n. 170;*
- O sin resurîts a la vite, *n. 171;*
- Benedete la zornade, *n. 172;*
- Il nestri Redentôr, *n. 173;*
- Si cjanti al Pari laut in cîl, *n. 174;*
- Nei cieli un grido risuonò, *n. 175;*
- O Cristo, sol di Pasqua, *n. 176.*

Salm 22 : Il Signôr al è il gno pastôr, *n. 241;*

- “ : Il Signore è mio pastore, *n. 277*;
- “ **94** : Vignît, batìn lis mans al Signôr, *n. 260*;
- “ **80** : Gjoldêt in Diu nestre fuarce, *n. 256*;
- “ **92** : Il Signôr al regne, *n. 258*;
- “ **97** : Cjantait al Signôr une cjante gnove, *n. 261*;
- “ **113a** : Cuant che Israel dal Egjit al è jessût, *n. 265*;
- “ **113b** : No a nô, Signôr, no a nô, ma al to non dai glorie, *n. 266*.

+ *Lis Rogazions che te tradizion nus preparin a la Sense, si cjatin tal libri Hosanna: pagjinis 329 – 335.*

+ *Domenie che e ven: Pentecostis-Pasche floride. Tai tims passâts e vignive precedude de benedizion da l'aghe come pe Pasche Majôr e pe Pasche Tafanie.*

* * *

Veni Creator spiritus, / mentes tuorum visita...
Anìn a fânus visite / o font di vite, Spiritu,
la ment e il cûr travaninus / de tô presince mistiche.
Anìn, e tu cofuartinus, / o sant Regâl di Gracie,
font vive, fûc e bonvolê, / consacrazion da l'anime.
 Hosanna, n. 180.

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La nuova base.*
- * *Par domandâ chescj libris scrivêt a info@glesiefurlane.org*